

კომპანიის ფინანსური სიმყარის რეიტინგის განსაზღვრა ქულობრივი მეთოდით

ნიკოლოზ ბაკაშვილი

ეკონომიკურ მეცნიერებათა დოქტორი,
პროფესორი, შპს აუდიტორული ფირმა
„ბაკაშვილი და კომპანია“ დირექტორი

რეზიუმე

სტატიაში „კომპანიის ფინანსური სიმყარის რეიტინგის განსაზღვრა ქულობრივი მეთოდით“ განხილულია ამჟამად გამოყენებული რაოდენობრივი და ხარისხობრივი (თვისობრივი) მეთოდები და მათ ნაკლად მიჩნეულია მათი შეჯერება-შეჯამების შეუძლებლობა. ამ ნაკლის დასაძლევად შემოთავაზებულია რაოდენობრივი მაჩვენებლების ქულებით შეფასება. ამ გზით ყველა რაოდენობრივი მაჩვენებელი გაერთმნიშვნელად გადასაქცევად. ამ მეთოდის დანერგვის სიძნელის გადასაღებად დასმულია საკითხი კომპანიების (დარგების მიხედვით) ფინანსური მაჩვენებლების ნორმატივების შემუშავების შესახებ.

საკვანძო სიტყვები: ფინანსური სიმყარე; რეიტინგი; ქულა; ქულობრივი მეთოდი; რეიტინგული კლასი; რანჟირება; ნორმატივი.

THE SCORING (MARKING) METHOD OF DEFINING COMPANY FINANCIAL FIRING RATING

Nikoloz Bakashvili

(Doctor of Economical sciences,
Professor, director of LTD
“Bakashvili and Company”)

SUMMARY

In the article „The Scoring (marking) method of defining company financial firming rating“ is discussed the current methods of amount and quality and the fault of this is the impossibility of their summarizing to each other. The best way to solve this problem is the assessment of amount index scoring. In this way it would be possible to reduce all the indexes to a common denominator. To avoid the difficulties it is raised the question to form of company (according to the fields) financial index normative.

Key words: financial firming, Rating, Score (marking), Scoring method, Rating grade, Ranking, Normative.

შესავალი

კომპანიის ფინანსური სიმყარე (ფინანსური სტაბილურობა) მისი გადახდისუნარიანობის, კრედიტუნარიანობის საფუძველია. მსოფლიოში, ალბათ, ცოტაა ისეთი ფირმა, რომელსაც საქმიანობის განსახორციელებლად საკუთარი სახსრები ყოფნის და-

ნარჩენი ფირმები ან ბანკებს აკითხავენ კრედიტის ასაღებად, ან - ინვესტორებს ინვესტიციების მისაღებად. ორივე შემთხვევაში კომპანიისგან გარანტიად მის ფინანსურ სიმყარეს მოითხოვენ და კომპანიის სასარგებლოდ გადანაცვტილების მიღებამდე, მას ამოწმებენ.

გარდა აღნიშნულისა, 2017 წლის 23 დეკემბერს №1935 კანონით საქართველოს „საგადასახადო კოდექსში“ ცვლილებები შევიდა და 224-ე მუხლით განისაზღვრა „ავტორიზებული ეკონომიკური ოპერატორი“, რომელიც საბაჟო კონტროლის დროს, სხვა გადასახადის გადამხდელთან შედარებით, ხელშემწყობი პირობებით სარგებლობს, რაც, ასევე, გულისხმობს მისი დოკუმენტებისა და მონაცემების შემოწმების და საქონლის, სატრანსპორტო საშუალებებისა და ტერიტორიის დათვალიერების ნაკლები სიხშირით განხორციელებას.

პირს ავტორიზებული ეკონომიკური ოპერატორის სტატუსი რომ მიენიჭოს, ერთ-ერთი აუცილებელი პირობაა, იგი გადახდისუნარიანი და ფინანსურად მდგრადი იყოს.

ეს შემოწმება სხვადასხვა მეთოდით ხორციელდება, რადგან არ არსებობს კომპანიის ფინანსური სიმყარის განსაზღვრის ერთიანი მეთოდიკა.

წინამდებარე სტატიაში მოცემულია კომპანიის ფინანსური სიმყარის, ანუ გადახდისუნარიანობის განსაზღვრის სრულყოფის გარკვეული მცდელობა.

ძირითადი ნაწილი

1. კომპანიის ფინანსური სიმყარის განსაზღვრის არსებული პრაქტიკის შეფასება.

კომპანიის ფინანსური სიმყარე რაოდენობრივი და ხარისხობრივი მაჩვენებლების შეფასებით ხორციელდება. რაოდენობრივი მაჩვენებლები 5 ჯგუფად იყოფა, ხარისხობრივი კი – ოთხ ჯგუფად.

რაოდენობრივ მაჩვენებელთა ჯგუფებია [1, გვ. 334]:

1. ლიკვიდობის კოეფიციენტები (მიმდინარე (საერთო), სწრაფი და აბსოლუტური);
2. საქმიანი აქტივობის კოეფიციენტები (აქტივების ბრუნვადობა, მარაგების ბრუნვადობა, დებიტორული დავალიანების ბრუნვადობა, საბრუნავი აქტივების ბრუნვადობა და სხვ.);
3. კაპიტალის სტრუქტურის კოეფიციენტები (ნასესხები სახსრებით უზრუნველყოფის, ავტონომიის და მანევრირების კოეფიციენტები);

4. მომგებიანობის (რენტაბელობის) კოეფიციენტები (აქტივების რენტაბელობა (ROA), საკუთარი კაპიტალის რენტაბელობა (ROE), რეალიზაციის რენტაბელობა (ROR));

5. საბაზრო აქტივობის კოეფიციენტები (მოგება ერთ აქციაზე, დივიდენდის დაფარვის კოეფიციენტი, აქციის კოტირების კოეფიციენტი, აქციის საბაზრო შეფასების კოეფიციენტი, ტობინის კოეფიციენტი და სხვ.).

ხარისხობრივ მაჩვენებელთა ჯგუფებია [2, გვ. 100]:

1. საკრედიტო ისტორიის შეფასების მაჩვენებელი;

2. მენეჯმენტის ხარისხის შეფასების მაჩვენებელი;

3. სესხის (ინვესტიციის) უზრუნველყოფის შეფასების მაჩვენებელი;

4. კომპანიის (ანუ მსესხებლის) საქმიანობის დარგის ეკონომიკური მდგომარეობის შეფასების მაჩვენებელი.

მოცემულ სტატიაში განვიხილავთ მხოლოდ ფინანსური სიმყარის განმსაზღვრელ რაოდენობრივ მაჩვენებლებს, შესაბამისად, ჩვენ მიერ წარმოდგენილი წინადადებაც მხოლოდ მათ შეეხებათ.

რაოდენობრივ მაჩვენებელთა 5 ჯგუფში 20 მაჩვენებელზე მეტია გაერთიანებული. მათი სიმრავლის გამო, ყველა ამ მაჩვენებელს არ ანგარიშობენ [3, გვ. 392] და მათ შორის ირჩევენ საკუთარი შეხედულებისამებრ, ყველაზე მისაღებს. კომპანიის ანალიტიკოსმა ამ მხრივ შეიძლება აირჩიოს კოეფიციენტების ერთ-ერთი ჯგუფი, ხოლო კომერციული ბანკის ან ინვესტორის ანალიტიკოსმა – სულ სხვა. ჩვენთვის ცნობილია, რომ კომერციული ბანკები კომპანიის კრედიტუნარიანობის დასადგენად ფულადი სახსრების მოძრაობასაც აანალიზებენ და გაყიდვების უდიდესი და უმცირესი მოცულობების სცენარებით სანარმოს გადახდისუნარიანობას საზღვრავენ [4, გვ. 150]. ასეთ რთულ სამუშაოებს კომპანიების ანალიტიკოსები არ ახორციელებენ. ამის შედეგად, დიდია ალბათობა იმისა, რომ ერთი და იგივე კომპანიის ფინანსურ სიმყარეზე გაკეთებული ბანკის და კომპანიის დასკვნები ერთმანეთს არ დაემთხვეს.

გარდა სიმრავლის ფაქტორისა, რაც საჭირო შემთხვევაში შეუძლებელს ხდის ყველა ზემოთ ჩამოთვლილი ფინანსური კოეფიციენტების გაანგარიშებას, არსებობს მათი შეჯამება-შეჯერების პრობლემაც. საქმიანი აქტივობის, ანუ ბრუნვადობის მაჩვენებლები დღეების რაოდენობაში ან წერებში იზომება, ლიკვიდობის მაჩვენებლები - კოეფიციენტებში ან პროცენტებში, კაპიტალის სტრუქტურის და რენტაბელობის მაჩვენებლებიც - პროცენტებში, საბაზრო აქტივობის მაჩვენებლების ნაწილი კი - ლარებში, ნაწილი - კოეფიციენტებში. განზომილებათა ერთეულების ასეთი განსხვავებულობის გამო, მათი არც შედარება შეიძლება და არც შეჯამება. ამასთან, ზოგიერთი მაჩვენებლის ზრდა დინამიკაში დადებითად ფასდება (მაგალითად, რენტაბელობის, ლიკვიდობის), ზოგიერთის კი - უარყოფითად (მაგალითად,

დღეებში გამოხატული საქმიანი აქტივობის მაჩვენებლების). ასე რომ, ამ მაჩვენებლებს ერთიანი მეთოდით ვერ შევაფასებთ. არადა, ფინანსური მონიტორინგის ჩატარება კომპანიის დირექციას სჭირდება იმისთვის, რომ გაარკვიოს, იზრდება და ფინანსურად მყარდება მისი სანარმო თუ დაცემას და გაკოტრებას განიცდის.

როცა სანარმო ინვესტორს ეძებს, ანდა ბანკიდან სესხის აღება სჭირდება, მან ორივეს ცალსახად არაორაზროვანი და გასაგები ანგარიშგება უნდა წარუდგინოს. გარდა ამოსავალი (საწყისი) ინფორმაციისა და ფინანსური კოეფიციენტებისა, მასში წარმოდგენილი უნდა იყოს სანარმოს ფინანსური მდგომარეობის შემფასებელი ზოგადი ინტეგრირებული მაჩვენებელი. სამწუხაროდ, ასეთი მაჩვენებელი საქართველოში არ გვაქვს.

ისიც მნიშვნელოვანია, რომ 2016 წლის 8 ივნისს მიღებული №5386 კანონით „ბუღალტრული აღრიცხვის, ანგარიშგებისა და აუდიტის შესახებ“ სავალდებულო გახდა აუდიტირებული ფინანსური ანგარიშგების გასაჯაროება/გამოქვეყნება 2018 წლის 1 იანვრიდან 1-ლი და მე-2 კატეგორიის სანარმოებისათვის, ხოლო 2019 წლის 1 იანვრიდან - მე-3 და მე-4 კატეგორიის სანარმოებისათვის.

რა თქმა უნდა, ეს არ ნიშნავს იმას, რომ აუდიტირებული ფინანსური ანგარიშგების შესახებ გასაჯაროებული ინფორმაცია ფინანსური მდგომარეობის/სიმყარის გათვლებს ეფუძნება, მაგრამ ზემოაღნიშნული შესაძლო ინვესტორისა თუ ბანკისთვის ის გადასახადის გადამხდელების ფინანსური მდგომარეობის შესახებ აუცილებელ გასაცნობ დოკუმენტად მოიაზრება.

როგორც უკვე აღვნიშნეთ, სანარმოთა ფინანსური მდგომარეობის ამსახველი სხვადასხვა მაჩვენებლის დაჯამება მათი განსხვავებული ზომის ერთეულების გამო არ შეიძლება. არადა ბანკიც და კერძო ინვესტორიც სანარმოს ინვესტიციური მიმზიდველობის და კრედიტუნარიანობის შესაფასებლად მოითხოვს ერთ განზოგადებულ ფინანსურ მაჩვენებელს, ანუ არა რენტაბელობას, ლიკვიდობას, საქმიან აქტივობას და ა. შ., არამედ მათ გამაერთმნიშვნელებელ მაჩვენებელს.

ასე რომ, ჩვენ მიერ დასმული საკითხი ეხება მოქმედი სანარმოების ფინანსური სიმყარის შეფასებას არა ხუთი ან 10 მაჩვენებლით, არამედ ერთი მაჩვენებლით. საზღვარგარეთ ამ საკითხზე დიდი ხანია, მუშაობენ, არსებობს გარკვეული შემოთავაზებებიც. ამერიკაში მეცნიერმა ე. ალტმანმა სანარმოს გაკოტრების საპროგნოზოდ ერთი მაჩვენებლის – Z-ანგარიშის ფორმულა შეიმუშავა [5, გვ. 223]:

პირველი ვარიანტი:

$$Z = 1,2 \cdot x_1 + 1,4 \cdot x_2 + 3,3 \cdot x_3 + 0,6 \cdot x_4 + 1,0 \cdot x_5$$

მეორე ვარიანტი:

$$Z = 0,717 \cdot x_1 + 0,847 \cdot x_2 + 3,10 \cdot x_3 + 0,42 \cdot x_4 + 0,995 \cdot x_5$$

პირველი ფორმულა შემუშავებულია სააქციო საზოგადოებისთვის, მეორე კი - ყველა დანარჩენი სახის სანარმოსთვის. მაგრამ ეს ფორმულები იძლე-

ვა პროგნოზს და არა არსებულ მდგომარეობას. საგულისხმოა, რომ, მათი სიზუსტე წლების მიხედვით კლებულობს, თანაც, Z-ის სიდიდეს, რომელიც მერყეობს 1,81-დან 2,675-ის დიაპაზონში, ალტმანმა „ჭაობი“ უწოდა, რაც ნიშნავს საწარმოს გადარჩენას ან, პირიქით, არგადარჩენას - „ჭაობში ჩახრჩობას“.

თუ საწარმო „ჭაობის“ მდგომარეობაშია, რით შეუძლია ინვესტორს ან ბანკს დაუსაბუთოს, რომ მათ მიერ დაფინანსების შემთხვევაში გადარჩება? ეს დიდი პრობლემაა.

ცნობილია, რომ კომპანიის ფინანსურ სიმყარეს სხვადასხვა მოდელით ანგარიშობენ, მათ შორისაა: რუსული მოდელი, მეცნიერ ბივერის მოდელი, მაკ-კინზის მეთოდიკა და სხვები [გვ. 6, 384], მაგრამ ისინი მრავალ ფინანსურ მაჩვენებელს მოიცავენ, რის გამოც ძნელდება ერთი შემაჯამებელი დასკვნის გაკეთება.

ეს პრობლემა მთელი მსოფლიოს ფინანსისტების წინაშე დგას. ზოგიერთმა ქვეყანამ იგი ნაწილობრივ გადაწყვიტა.

მთელ მსოფლიოში საწარმოთა რეიტინგის დასადგენად სამი მეთოდი გამოიყენება: [7, გვ. 171]:

- ნომრული მეთოდი;
- ქულობრივი მეთოდი;
- ინდექსური მეთოდი.

ნომრული სისტემა გამოიყენება ნაკლები ფაქტორების გავლენის ქვეშ მყოფი დარგის საწარმოებისთვის, ქულობრივი და ინდექსური კი – რთულ დარგებში. ჩამოთვლილი მეთოდებიდან საქართველოში არც ერთი არ გამოიყენება. საერთოდ ჩვენთან საწარმოთა რანჟირება ფინანსური მდგომარეობის მიხედვით არ ხორციელდება. საწარმოები ამას არც თავისთვის აკეთებენ და არც ინვესტორებისთვის. ამის ძირითადი მიზეზია, ალბათ, ის, რომ ამ კომპეტენციის მქონე კადრები მათ არ ჰყავთ.

რადგან საწარმოთა რეიტინგულ რანჟირებაზე მუშაობის საწყის ეტაპზე ვიმყოფებით, ჩვენი აზრით, უფრო უპრიანი იქნება საწარმოთა რანჟირება ქულობრივი სისტემით, რადგან ნაწილობრივ არსებობს ფინანსური კოეფიციენტების ნორმატივებიც, რეიტინგის კლასებიც (სულ 5 კლასი) და მათი შესაბამისი ქულობრივი შეფასებებიც. უმაღლეს კლასში მოხვედრილ ფინანსურ მაჩვენებელს 4 ქულა ეძლევა, პირველში მოხვედრილს – 3 ქულა, მეორეში – 2 ქულა, მესამეში – 1 ქულა, მეოთხეში – 0 ქულა. ფინანსურ კოეფიციენტს ქულა მიენიჭება ნორმატივის შესაბამისად. მაგალითად, მიმდინარე (საერთო) ლიკვიდურობის ნორმა 2,0, რაც იმას ნიშნავს, რომ საწარმოს საბრუნავი აქტივები არანაკლებ 2-ჯერ მეტი უნდა იყოს მის მოკლევადიან ვალდებულებაზე. თუ საწარმოს საქმიანობის ანალიზისას ეს მაჩვენებელი მართლაც 2 ან მასზე მეტიც აღმოჩნდა, მას მიენიჭება უმაღლესი 4 ქულა ანუ მოხვედრა რეიტინგის უმაღლეს კლასში, მაგრამ თუ ეს მაჩვენებელი 1-ის ტოლია, მაშინ მას მიეცემა 2 ქულა (4-ის ნახევარი) და ა. შ. ასე მოხდება სხვა მაჩვენებლების მიმართაც.

საბოლოოდ, ქულები დაჯამდება და განისაზღვრება საწარმოს ფინანსური რეიტინგული კლასი, რომელიც იქნება [8]: 57-68 ქულაზე – უმაღლესი; 47-56 ქულაზე – პირველი; 39-46 ქულაზე – მეორე; 25-38 ქულაზე – მესამე; 20-24 ქულაზე – მეოთხე.

უმაღლესი რეიტინგული კლასის მქონე საწარმო შეძლებული, ფინანსურად მყარი კრედიტუნარიანი საწარმოა. პირველი კლასის საწარმოს ფინანსურად უჭირს – რისკის ზონაშია, მეორე კლასის საწარმო კრიზისშია, მესამე – გადახდისუუნაროა, მეოთხე კი – გაკოტრების პირასაა.

როგორც უკვე აღვნიშნეთ, ასეთი ანალიზი და საწარმოთა ფინანსური მდგომარეობის რეიტინგების განსაზღვრა საქართველოში არ ხდება. არადა ამ მეთოდით გაანალიზების შემდეგ დგინდება საწარმო „ცოცხალია“ თუ „მკვდარი“, ან „უფრო ცოცხალი“ თუ „უფრო მკვდარი“.

იმის დასადასტურებლად, რომ საქართველოს კომპანიების ფინანსური სიმყარის ზუსტად განსაზღვრისთვის ამ მეთოდის გამოყენება მართლაც მიზანშეწონილია, კომპანია „X“-ის მაგალითზე წარმოვადგენ მის გაანგარიშებას (ცხრილი 1. ცხრილში მოცემული მაჩვენებლების მნიშვნელობები და აგრეთვე ზოგიერთი ნორმატივი პირობითია).

ცხრილში ფინანსურ კოეფიციენტებზე მინიჭებულ ქულათა საერთო რაოდენობაა 43. ამ ქულებით მოცემული „X“ კომპანია ხვდება მეორე რეიტინგულ კლასში (39-46 ქულების კლასი), ანუ მას კრიზისი ეწყება. ცხადია, ასეთ კომპანიას არც ბანკი მისცემს სესხს და არც ინვესტორი – ინვესტიციას.

როგორც ვხედავთ, ამ მეთოდით კომპანიის ფინანსური სიმყარის გამოანგარიშება მეტად ადვილია. მისი ათვისება არც ერთ ანალიტიკოსს არ გაუჭირდება, მაგრამ მის დანერგვამდე, უპირველესად, საჭიროა, საქართველოში შევიშუშოთ ფინანსური კოეფიციენტების დარგობრივი ნორმატივები. ის, რაც დღეს არსებობს, უცხოურია, შესაბამისად, იმათი პირობების გათვალისწინებითაა შედგენილი და, ამდენად, საქართველოს კომპანიებს ნაკლებად ესადაგება. მაგალითად, ავტონომიის უცხოური ნორმატივია 0,5. ეს იმას ნიშნავს, რომ კომპანიას მთელი თავისი საქმიანობისთვის საჭირო სახსრების ნახევარი საკუთარი უნდა ჰქონდეს. სხვა შემთხვევაში მას არც ბანკი მისცემს სესხს და არც ინვესტორი – ინვესტიციას. საქართველოში, რომელიც ახლა დაადგა საბაზრო ეკონომიკის განვითარების გზას, ასეთ საწარმოთა რიცხვი თითქმის ჩამოსათვლელია. თუ ამ ნორმატივს დავამკვიდრებთ, მაშინ რა ქნან სხვა კომპანიებმა, რომელთაც საკუთარი სახსრები არ აქვთ, მათ როგორ იმუშაონ?

ამის გარდა, ჩვენთვის ფინანსური კოეფიციენტების ყველა უცხოური ნორმატივიც არ არის ცნობილი. ასეთებია: სამეურნეო აქტივობის კოეფიციენტები და საბაზრო აქტივობის კოეფიციენტები (გარდა ტობინის კოეფიციენტისა). ამიტომ, ცხრილში მათი პირობითი ნორმატივები გამოვიყენეთ.

ცხრილი 1
კომპანია „X“-ის ფინანსური სიმყარის რეიტინგი ქულების მიხედვით

	ფინანსური მდგომარეობა	პირობითი ნორმატივი	მინიმალური ქულა
I. ლიკვიდობის კოეფიციენტები			
1. მიმდინარე, ანუ საერთო	2,0	2,0	4
2. სწრაფი ლიკვიდობის	0,4	0,2	4
3. აბსოლუტური ლიკვიდობის	0,015	0,	2
II. კაპიტალის სტრუქტურის კოეფიციენტები			
1. ნასესხები სახსრებით უზრუნველყოფის	0,7	0,5	1
2. ავტონომიის	0,3	0,5	2
3. მანევრირების	1,0	0,5	4
III. რენტაბელობის კოეფიციენტები			
1. აქტივების რენტაბელობის	0,17	0,55	1
2. საკუთარი კაპიტალის რენტაბელობის	0,21	0,10-0,30	3
3. რეალიზაციის რენტაბელობის	0,08	0,15	1
IV. საქმიანი აქტივობის კოეფიციენტები (ჯერებში)			
1. საბრუნავი სახსრების ბრუნვადობის	8	10	3
2. აქტივების ბრუნვადობის	4	1,5	2
3. მარაგების ბრუნვადობის	1	3	2
4. დებიტორული დავალიანების ბრუნვადობის	1	1	4
V. საბაზრო აქტივობის კოეფიციენტები			
1. დივიდენდების დაფარვის კოეფიციენტი	0,5	1,0	2
2. აქციების კოტირების კოეფიციენტი	3	1,5	4
3. აქციის საბაზრო შეფასების კოეფიციენტი	0,8	2	3
4. ტობინის კოეფიციენტი	0,7	>1	1
სულ			43 ქულა

ასე რომ, რადგან ჩვენ გარდამავალი ეკონომიკის და, იმავდროულად, განსხვავებული სამუშაო პირობების მქონე ქვეყანას წარმოვადგენთ, ჩვენი ნორმატივები გვჭირდება, რისი მოგვარებაც საქართველოს ფინანსთა სამინისტროს კომპეტენციაში შედის.

დასკვნა

კომპანიების ფინანსური სიმყარის გამოსაანგარიშებლად სხვადასხვა მეთოდის შეფასებით, სტატიაში იმ დასკვნამდე მივყავართ, რომ საჭიროა, არსებობდეს მათი გამაერთმნიშვნელებელი რაიმე მექანიზმი, რომლის ათვისებაც ადვილი იქნება და გამოყენებაც. ასეთად მივიჩნიეთ ჯერ კიდევ 70-იან წლებში აშშ-ში შემუშავებული ქულობრივი მეთოდი. მისი გამოყენებით კომპანიებიც და მათი დამფინანსებლებიც (ბანკები, ინვესტორები) „ერთ ენაზე“ ილაპარაკებენ. ამ მეთოდის დასანერგად საჭიროა, საქართველოს ფინანსთა სამინისტრომ დარგების მიხედვით შეიმუშაოს ფინანსური კოეფიციენტების ნორმატივები.

გამოყენებული ლიტერატურა:

1. ლუდუშაური ზ., ფინანსური მენეჯმენტი, გამომცემლობა „საჩინო“, თბ., 2015.
2. პაპასკირი რ., ლექციების კურსი საბანკო მენეჯმენტსა და კორპორაციულ ფინანსებში, გამომცემლობა „უნივერსალი“, თბ., 2012.
3. Ковалев В., Финансовый менеджмент. М., Проспект, 2007.

4. გოგოხია მ., საბანკო საქმე, თბ., 2008.
5. Петров А., Петрова В., Комплексный анализ финансовой деятельности банка, Финансы и статистика, М., 2007.
6. ბაკაშვილი ნ., ფინანსები, ფინანსური ანგარიშგება და აუდიტი, გამომცემლობა „უნივერსალი“, თბ., 2015.
7. Оптнер С. Системный анализ для решения деловых и промышленных проблем, М., 1969.
8. Чангин Д. Об определении рейтинга предприятия малого бизнеса, М., 1998.

BIBLIOGRAPHY:

1. Gudushauri Z., Financial Management, “Sachino” publishing, Tb. 2015.
2. Papaskiri R., The course of lectures in Banking management and corporate finances, “Universali” publishing, Tb. 2012.
3. Kovalev V., Financial Management, M., Prospect, 2007.
4. Gogokhia M., Banking, Tb, 2008.
5. Petrov A., Petrova V., the complex analyze of bank financial business, finances and statistics, M., 2007.
6. Bakashvili N., Finance, Financial accounting and Audit, “Universal” publishing, Tb. 2015.
7. Optner S., The system analyze for solving business and industrial problems, M., 1969.
8. Changin D., About defining the rating of industrial small business, M., 1998.